

Namjera je redakcije da pitanje uloge inteligencije u sistemu izgradnje socijalizma zahvati iz vrlo različitih aspekata: političkog, ekonomskog, moralnog, psihološkog, filozofskog, sociološkog, ne gubeći pri tome iz vida da će težište ipak biti politički aspekt uloge inteligencije u sistemu samoupravljanja. Redakcija časopisa se već obratila jednom dijelu naših javnih radnika koji se bave tim pitanjem, označivši pri tome neke konkretnije teme iz ovog šireg područja, kao na primjer: inteligencija kao društvena grupa; položaj inteligencije u kapitalizmu; inteligencija i socijalna revolucija; uloga inteligencije u našoj narodnoj revoluciji; uloga inteligencije u procesu izgrađivanja socijalizma; inteligencija i politika; inteligencija i klasa; inteligencija i elitne društvene grupe; inteligencija i proces društvenog samoupravljanja; inteligencija i nagrađivanje prema radu; inteligencija i SKJ; inteligencija i nacionalno pitanje; stavovi intelektualne omladine prema radnicima i manuelnom radniku; izgradnja socijalizma i pitanje prevladavanja protivvrječnosti između intelektualnog i manuelnog rada; slobodno vrijeme i intelektualni razvitak itd. Ovdje su označene samo neke moguće teme. Puna inicijativa u izboru i u načinu obrade tema ostavlja se zainteresiranim licima.

Pored priloga posvećenih temi »Inteligencija i njena uloga u procesu izgradnje socijalizma«, koje donosimo u ovom dvobroju Redakcija namjerava u slijedećim brojevima nastaviti s objavljivanjem materijala vezanih uz ovu značajnu i veoma aktuelnu problematiku.

Druga osnovna tema kojoj Redakcija misli posvetiti svoju glavnu pažnju u slijedećim brojevima jeste: Društveno-političke organizacije u sistemu društvenog samoupravljanja. U okviru ove teme predviđaju se četiri osnovna područja: Teorija i praksa partije u uvjetima samoupravljanja; Socijalistički savez u demokratskom sistemu samoupravljanja; Savez sindikata u uvjetima sistema samoupravljanja; Savez omladine i druge organizacije u sistemu samoupravljanja i savezi udruživanja građana kao oblici upravljanja u stručnim, naučnim i drugim slobodnim djelatnostima građana. Iz ovih područja navodimo nekoliko mogućih tema: Rukovodeća uloga KP u uvjetima državnog socijalizma — politička emancipacija birokracije; vodeća uloga SK u uvjetima samoupravljanja — politička emancipacija samoupravljanja; nužnost vođenja kao razrješenja protivvrječnosti između samoupravljanja kao socijalističke demokracije i samoupravljanja kao društveno-ekonomskog odnosa; instrumentalnost Socijalističkog saveza u kreiranju političke zajednice građana od strane samih građana; medijatornost Socijalističkog saveza između političke zajednice građana i instituta izborne demokracije — otklanjanje političkog diskontinuiteta između birača i biranog; Socijalistički savez kao mnogoznačni oblik demokratskog samoupravljanja; teorija i praksa debirokratizacije i kadrovska politika; politička uloga Saveza sindikata u stvaranju zajednice proizvođača-upravljača; Savez sindikata kao politički okvir usklađivanja ekonomskih pojedinačnih i zajedničkih interesa s općim interesima; proces oslobođenja rada i radničke klase kao negacija kapitala kao društvenog odnosa; poduzetnička funkcija proizvođača kao sadržaj ekonomskog upravljanja; Savez sindikata kao realizacija obrata ekonomije u politiku; uloga Saveza sindikata u postupnom osposobljavanju radnika kao upravljača i njihovog transformiranja od proizvođača u demokratskog upravljača.

Redakcija »Političke misli« planira da u toku ove godine održi jedno ili dva savjetovanja, razgovora koji bi bili posvećeni dvjema označenim temama. No, nezavisno od toga Redakcija moli sva lica koja su zainteresirana za saradnju u ovom časopisu da svoje priloge dostave Uredništvu bez posebnih i specijalnih poziva na saradnju. Ovih nekoliko uvodnih napomena treba shvatiti istovremeno i kao poziv na saradnju.

Među konkretnim zadacima koje je Redakcija časopisa stavila sebi u zadatak nalazi se i povezivanje s Jugoslavenskim unapređenjem političkih nauka, koje može dati vrlo korisne rezultate i osigurati časopisu kvalitetnu suradnju naših eminentnih politologa. Istovremeno Fakultet političkih nauka i Redakcija »Političke misli« učinili su i prve konkretne napore kako bi se učvrstile i dalje razvile veze s višim školama političkih nauka iz ostalih dijelova naše zemlje. Posebno mjesto u širenju oblika svestrane suradnje ima naš časopis koji može da postane zajedničko jugoslavensko sredstvo izmjene iskustava i dostignuća postignutih na polju širenja političke nauke.

Smatramo potrebnim da naglasimo da se časopis »Politička misao« razmjenjuje sa osamdeset inostranih časopisa iz raznih zemalja, tako da prilozi koji se štampaju u nas imaju u stvari vrlo široki publicitet u svijetu.

Redakcija časopisa